

14 MAY 2003

SUKAN: MALIK SASAR KURANG 20 JAM RENANGI KUALA PERLIS-LANGKAWI

KUALA LUMPUR, 14 Mei (Bernama) -- Perenang maraton laut terbuka negara Abdul Malik Mydin, yang akan berenang dari Kuala Perlis ke Langkawi pada 24 Mei ini, dijangka mampu menamatkan renangan sejauh 48 kilometer itu dalam tempoh kurang 20 jam.

Sekretariat Cabaran Selat Inggeris 2003 berkata keyakinan itu dinyatakan jurulatihnya John Van Wisse berdasarkan latihan intensif Abdul Malik di Melbourne, Australia.

Walaupun dia mensasarkan 20 jam tetapi berdasarkan latihan intensifnya, Abdul Malik boleh menamatkan renangannya dalam tempoh antara 16 dan 18 jam, kata Wisse.

Renangan itu yang akan disaksikan oleh Perdana Menteri Datuk Seri Dr Mahathir Mohamad adalah satu daripada program latihan Abdul Malik yang akan berenang merentasi Selat Inggeris pada Ogos ini, kata sekretariat itu dalam satu kenyataan di sini, hari ini.

Abdul Malik akan memulakan renangan dari Kuala Perlis pada 9 malam, 24 Mei dan berakhir di Dataran Lang, Langkawi pada sebelah petang keesokannya.

Wakil Persekutuan Renang dan Pengemudian Terusan selaku badan rasmi yang bertanggungjawab memantau setiap renangan Abdul Malik akan turut menyaksikan aksinya itu bagi menilai teknik renangannya.

-- BERNAMA

MAF NM NAK